

Na osnovu člana 106. stav (7) Zakona o visokom obrazovanju – prečišćeni tekst ("Službene novine Tuzlanskog kantona", broj: 21/21, 22/21, 5/22, 11/22, 16/22 i 5/25), ministar obrazovanja i nauke Tuzlanskog kantona, donosi

ODLUKU
o uslovima, kriterijima i postupku dodjele stipendija nadarenim redovnim studentima
javne visokoškolske ustanove

I – OPĆE ODREDBE

Član 1.

(Predmet)

Ovom odlukom bliže se uređuju uslovi, kriteriji i postupak dodjele stipendija nadarenim redovnim studentima javne visokoškolske ustanove koja djelatnost visokog obrazovanja obavlja na području Tuzlanskog kantona (u daljem tekstu: Univerzitet) prvog i integrisanog prvog i drugog ciklusa studija.

Član 2.

(Finansijska sredstva)

(1) Sredstva za dodjelu stipendija osigurana su u Budžetu Tuzlanskog kantona za 2025. godinu (u daljem tekstu: Budžet), na budžetskoj poziciji 24010018 – Ministarstvo obrazovanja i nauke, u okviru glavne grupe konta 614200 ODD207 (fun.kod 0941) - stipendiranje posebno nadarenih redovnih studenata javne visokoškolske ustanove.

(2) Stipendija može biti dodijeljena jednokratno ili u više mjesečnih rata, zavisno od planiranih i raspoloživih sredstava u Budžetu, što se bliže određuje ugovorom iz člana 15. ove odluke.

Član 3.

(Visina stipendije)

(1) Visina stipendije, u pravilu, iznosi 1.500,00 (jedna hiljad i pet stotina) konvertibilnih maraka.

(2) Visina stipendije iz stava (1) ovog člana može se mijenjati, u zavisnosti od iznosa planiranih i obezbijedenih sredstava u Budžetu, kao i broja prijavljenih kandidata koji ispunjavaju uslove i kriterije određene ovom odlukom.

Član 4.

(Ukupan broj korisnika stipendije)

(1) Pravo na stipendiju po ovoj odluci može se odobriti za ukupno 160 kandidata i to:

- a) 150 stipendija posebno nadarenim redovnim studentima Univerziteta;
- b) 10 stipendija posebno nadarenim redovnim studentima Univerziteta, koji se nalaze u statusu povratnika.

(2) Izuzetno, od stava (1) ovog člana, ukoliko u okviru jedne kategorije studenata pravo na dodjelu stipendije ostvari broj studenata manji od predviđenog, preostali iznos sredstava, nakon okončanja postupka po prigovorima, se prenosi na drugu kategoriju do utroška istih shodno utvrđenom redoslijedu kandidata na Konačnoj rang listi.

II – USLOVI ZA DODJELU STIPENDIJE

Član 5.

(Uslovi za dodjelu stipendija)

(1) Uslovi koje kandidat za dodjelu stipendije mora ispunjavati su:

- a) Da je državljanin Bosne i Hercegovine,
- b) Da ima prebivalište na području Tuzlanskog kantona ili da se nalazi u statusu povratnika, odnosno čiji se roditelj nalazi u statusu povratnika,
- c) Da se nalazi u statusu redovnog studenta prvog ili integrisanog prvog i drugog ciklusa studija Univerziteta,
- d) Da je u tekućoj akademskoj godini prvi puta upisao odnosnu godinu studija,
- e) Da je u prethodnoj godini studija ostvario prosjek ocjena minimalno 9,00,
- f) Da je položio sve ispite iz prethodnih godina studija.

(2) Izuzetno od uslova utvrđenih stavom (1) tačka e) i f) ovog člana, kandidat za dodjelu stipendije u statusu studenta prve godine studija, pravo na dodjelu stipendije može ostvariti pod uslovom da je u prethodne četiri godine redovnog školovanja ostvario prosjek ocjena 5,00.

III – KRITERIJI ZA DODJELU STIPENDIJE

Član 6.

(Kriteriji za dodjelu stipendije)

(1) Kriteriji za dodjelu stipendija su:

- a) visina prosjeka ocjena ostvarena u prethodnoj godini studija, odnosno prethodne četiri godine redovnog školovanja, u odnosu na tekuću akademsku godinu,
- b) upisana godina studija,
- c) visina prosjeka ocjena ostvarena u svim godinama studija koje prethode godini studija upisanoj u akademskoj godini u kojoj se stipendija dodjeljuje,
- d) rezultati ostvareni na takmičenjima u prethodnoj školskoj godini za kandidate prve godine studija,
- e) kandidat koji je redovan student studijskog programa koji spada u deficitarna zanimanja.

(2) Kriterij iz stava (1) tačka c) ovog člana primjenjuje se samo u slučaju ukoliko na rang listi dva ili više kandidata imaju isti broj bodova, u kom slučaju se prednost daje kandidatu koji je ostvario veći ukupan prosjek ocjena u svim godinama studija koje prethode godini studija upisanoj u akademskoj godini u kojoj se stipendija dodjeljuje.

(3) Ukoliko se prednost na rang listi ne može utvrditi po osnovu kriterija utvrđenih stavom (1) i (2) ovog člana, prednost se daje kandidatu čije domaćinstvo, po članu porodičnog domaćinstva, ostvaruje manji procenat prosječne neto plaće ostvarene u Federaciji Bosne i Hercegovine u prethodnoj godini prema podacima Zavoda za statistiku Federacije Bosne i Hercegovine, u kom slučaju će se od kandidata naknadno tražiti potrebna dokumentacija.

(4) Pod kriterijem iz stava (1) tačka d) ovog člana podrazumijevaju se samo rezultati ostvareni na takmičenjima iz nastavnih predmeta koji se izučavaju ili pripadaju naučnoj oblasti na studijskom programu, na koji je kandidat upisan kao redovni student, a koja su organizovana u skladu sa Pravilnikom o organizaciji takmičenja učenika srednjih škola („Službene novine Tuzlanskog kantona“, broj: 1/23).

Član 7.

(Bodovi po osnovu ostvarenog uspjeha)

Po osnovu ostvarenog uspjeha u prethodnoj godini studija, odnosno prethodne četiri godine redovnog školovanja za studente prve godine studija, kandidatu pripadaju bodovi kako slijedi:

- | | |
|------------------------------|------------|
| a) prosjek ocjena 10,00..... | 100 bodova |
| b) prosjek ocjena 9,9..... | 95 bodova |
| c) prosjek ocjena 9,8..... | 90 bodova |
| d) prosjek ocjena 9,7..... | 85 bodova |
| e) prosjek ocjena 9,6..... | 80 bodova |
| f) prosjek ocjena 9,5..... | 75 bodova |
| g) prosjek ocjena 9,4..... | 70 bodova |
| h) prosjek ocjena 9,3..... | 65 bodova |
| i) prosjek ocjena 9,2..... | 60 bodova |
| j) prosjek ocjena 9,1..... | 55 bodova |
| k) prosjek ocjena 9,00..... | 50 bodova |
| l) prosjek ocjena 5,00..... | 50 bodova |

Član 8.

(Bodovi po osnovu upisane godine studija)

Po osnovu upisane godine studija kandidatu pripadaju bodovi kako slijedi:

- a) student šeste godine studija 6 bodova,
- b) studnet pete godine studija.....5 bodova,
- c) studnent četvrte godine studija4 boda,

- d) student treće godine studija3 boda,
- e) student druge godine studija.....2 boda,
- f) student prve godine studija.....1 bod.

Član 9.

(Bodovi po osnovu ostvarenog uspjeha na takmičenjima)

(1) Po osnovu ostvarenog uspjeha na takmičenjima u prethodnoj školskoj godini, kandidatu koji je upisan u prvu godinu studija pripadaju bodovi kako slijedi:

- a) ostvareno prvo, mjesto na međunarodnom takmičenju... 12 bodova
- b) ostvareno drugo mjesto na međunarodnom takmičenju 11 bodova
- c) ostvareno treće mjesto na međunarodnom takmičenju10 bodova
- d) ostvareno prvo mjesto na državnom takmičenju 9 bodova
- e) ostvareno drugo mjesto na državnom takmičenju 8 bodova
- f) ostvareno treće mjesto na državnom takmičenju.....7 bodova
- g) ostvareno prvo mjesto na federalnom takmičenju..... 6 bodova
- h) ostvareno drugo mjesto na federalnom takmičenju..... 5 bodova
- i) ostvareno treće mjesto na federalnom takmičenju... 4 bodova
- j) ostvareno prvo mjesto na kantonalnom takmičenju 3 bodova
- k) ostvareno drugo mjesto na kantonalnom takmičenju 2 bodova
- l) ostvareno treće mjesto na kantonalnom takmičenju..... 1 bodova.

(2) Bodove iz stava (1) ovog člana kandidat može ostvariti samo po jednom osnovu, i to osnovu koji je povoljniji za kandidata.

Član 10.

(Bodovi po osnovu pohađanja deficitarnog zanimanja)

Kandidatu koji je redovan student studijskog programa Razredna nastava dodjeljuje se 20 bodova.

IV – POSTUPAK DODJELE STIPENDIJE

Član 11.

(Postupak dodjele sredstava)

(1) Dodjela sredstava vrši se nakon provedenog konkursa za dodjelu stipendija nadarenim studentima (u daljem tekstu: konkurs), koji za svaku akademsku godinu za koju su obezbijeđena sredstva u Budžetu raspisuje Ministarstvo obrazovanja i nauke Tuzlanskog kantona (u daljem tekstu: Ministarstvo).

(2) Konkurs se objavljuje na internet stranici Vlade Tuzlanskog kantona (u daljem tekstu: Vlada) i Ministarstva, a uporedo sa objavljivanjem konkursa Ministarstvo o objavljenom konkursu, u pisanoj formi, obavještava Univerzitet, koji je tu obavijest obavezan postaviti na oglasnoj ploči Univerziteta.

(3) Prijava na konkurs, sa potrebnom dokumentacijom, podnosi se Ministarstvu, u roku od petnaest dana od dana objavljivanja konkursa na internet stranici Ministarstva.

(4) Tekst konkursa obavezno sadrži:

- a) pravni osnov za raspisivanje konkursa,
- b) rok za podnošenje prijave po konkursu,
- c) iznos stipendije koji se dodjeljuje,
- d) uslove i kriterije za dodjelu stipendije,
- e) spisak potrebne dokumentacije koja se prilaže uz prijavu,
- f) druge elemente značajne za provođenje konkursa.

Član 12.

(Dokumentacija)

(1) Uz prijavu na konkurs koja je sastavni dio ove odluke (prilog I), kandidat dostavlja sljedeću dokumentaciju (u originalu ili ovjerenoj kopiji):

- a) uvjerenje o državljanstvu,
- b) dokaz o prebivalištu,
- c) dokaz da kandidat ima status povratnika u lokalnoj zajednici u kojoj ima prebivalište,
- d) uvjerenje Univerziteta iz Priloga II ove Odluke, osim za kandidate koji su u tekućoj akademskoj godini upisani u prvu godinu studija,

- e) Uvjerenje Univerziteta da se kandidat nalazi u statusu redovnog studenta i da je u tekućoj akademskoj godini prvi put upisana godina studija za kandidate koji su u tekućoj akademskoj godini upisani u prvu godinu studija,
- f) svjedočanstva o završene prethodne četiri godine redovnog školovanja, za kandidate koji su u tekućoj akademskoj godini upisani u prvu godinu studija,
- g) dokaz o ostvarenim nagradama na takmičenjima, za kandidate koji su tekućoj akademskoj godini upisani u prvu godinu studija,
- h) drugu dokumentaciju određenu tekstom konkursa.

(2) Prijave koje nisu sačinjene na obrascu iz stava (1) ovog člana, kao i uvjerenja koja nisu dostavljena na obrascu iz stava (1) tačka d) ovog člana neće se uzimati u razmatranje, što će posebno biti naznačeno u tekstu konkursa.

Član 13. (Komisija)

(1) Konkursnu proceduru provodi komisija koju čine najmanje tri člana predstavnika Ministarstva, koju imenuje ministar obrazovanja i nauke Tuzlanskog kantona (u daljem tekstu: ministar).

(2) Komisija radi na sjednicama i za svoj rad odgovara ministru.

(3) Članovi komisije ne mogu biti lica čiji članovi porodičnog domaćinstva učestvuju u postupku za dodjelu stipendije.

(4) Komisija je dužna razmotriti prijave u pogledu blagovremenosti i potpunosti i ispunjavanja uslova propisanih ovom odlukom, te utvrditi broj bodova po svakom od osnova, ukupan broj bodova po kriterijima za dodjelu stipendije i najkasnije u roku od osam dana od dana zatvaranja konkursa, sačiniti prijedlog rang liste kandidata za dodjelu stipendija za nadarene redovne studente Univerziteta i prijedlog rang liste kandidata za dodjelu stipendija za nadarene redovne studnete Univerziteta koji se nalaze u statusu povratnika, te liste kandidata čiji su zahtjevi neosnovani, nekompletni ili neblagovremeni, i iste objaviti na internet stranici Vlade Tuzlanskog kantona i internet stranici Ministarstva.

(5) Prijedlog rang liste obavezno sadrži:

- a) prezime, ime jednog roditelja, ime podnosioca zahtjeva,
- b) broj bodova po svakom od utvrđenih kriterija,
- c) ukupan broj bodova po svim kriterijima,
- d) u slučaju utvrđivanja prednosti pri jednakom broju bodova podatke o kriterijima na osnovu kojih je utvrđena prednost i

e) pouku o pravnom lijeku sa tačno naznačenim rokom do kada se može izjaviti prigovor.

(6) Neblagovremene i nepotpune prijave komisija neće uzimati u razmatranje, a prijavljeni kandidati o razlozima ne postupanja po zaprimljenim prijavama obavještavaju se isticanjem posebne liste.

(7) Ukoliko komisija nakon razmatranja prijave i dokumentacije priložene uz istu utvrdi da kandidat ne ispunjava uslove iz člana 5. ove odluke, prijavu kandidata će odbiti, a prijavljeni kandidat o razlozima odbijanja prijave se obavještava putem liste iz stava (6) ovog člana.

Član 14. (Postupak po prigovoru i donošenje konačne rang liste)

(1) Nezadovoljni kandidati mogu podnijeti prigovor na prijedloge rang lista i liste u roku od tri dana od dana isticanja listi na internet stranici Ministarstva.

(2) O prigovorima iz stava (1) ovog člana odlučuje ministar u roku od tri dana od dana isticanja roka za podnošenje prigovora.

(3) Konačne rang liste za dodjelu stipendija utvrđuje ministar.

Član 15. (Ugovor)

(1) Na osnovu konačnih rang listi ministar sa kandidatom zaključuje ugovor kojim se uređuju međusobna prava i obaveze.

(2) Ugovor iz stava (1) ovog člana zaključuje se najkasnije u roku od sedam dana od dana isticanja konačne rang liste dobitnika stipendije na internet stranici Ministarstva.

(3) Kandidat koji u ostavljenom roku ne potpiše ugovor smatrat će se da je odustao od stipendije, izuzev ako kandidat iz opravdanih razloga nije u mogućnosti potpisati ugovor u ostavljenom roku, o čemu je

obavezan dostaviti dokaz na osnovu koga će mu se utvrditi novi termin za potpisivanje ugovora.

(4) Stipendije su nepovratne pod uslovom da kandidat kao potpisinik ugovora redovno ispunjava svoje ugovorene obaveze.

V – NAČIN ISPLATE STIPENDIJE

Član 16. (Isplata stipendije)

(1) Isplata stipendije vrši se prijenosom sredstava na transakcijski račun korisnika iste, nakon zaključivanja ugovora iz člana 15. ove odluke.

(2) Prije zaključivanja ugovora iz stava (1) ovog člana ministar donosi odluku kojom utvrđuje listu dobitnika stipendija, a koja pored općih podataka o dobitnicima stipendija (ime i prezime, naziv visokoškolske ustanove i fakulteta, godina studija) sadrži i sljedeće podatke:

- a) pojedinačan iznos stipendije,
- b) način uplate dodijeljenih stipendija,
- c) budžetsku poziciju sa koje se sredstva odobravaju, te
- d) eventualno druge relevantne podatke.

Član 17. (Gubitak prava na isplatu stipendije)

(1) Korisnik gubi pravo na isplatu stipendije, a isplaćenu stipendiju dužan je vratiti u cjelosti ili odgovarajućem iznosu, u zavisnosti od okolnosti koje su dovele do gubitka stipendije, što će se posebno regulisati odredbama ugovora, ukoliko nastupe sljedeće okolnosti:

- a) ako mu bude izrečena disciplinska mjera isključenja sa Univerziteta,
- b) ako mu po nekom osnovu prestane status redovnog studenta na Univerzitetu,
- c) ako se naknadno utvrdi da je prilikom prijave na konkurs iznio lažne činjenice ili upotrijebio lažne dokaze.

(2) Korisnik stipendije dužan je prijaviti svaku promjenu koja je od uticaja na korištenje dodijeljene stipendije, u roku od 15 dana od dana nastupanja iste.

VI – ZAVRŠNE ODREDBE

Član 18. (Stupanje na snagu)

Ova odluka stupa na snagu danom donošenja, i bit će objavljena u „Službenim novinama Tuzlanskog kantona“.

BOSNA I HERCEGOVINA
Federacija Bosne i Hercegovine
TUZLANSKI KANTON
Ministarstvo obrazovanja i nauke
Broj: 10/1-34-031273/25
Tuzla, 17.10.2025. godine

MINISTAR
Dr.sc. Ahmed Omerović

PRIJAVNI OBRAZAC

na Konkurs za dodjelu stipendija nadarenim redovnim studentima javne visokoškolske ustanove koja djelatnost visokog obrazovanja obavlja na području Tuzlanskog kantona, prvog i integrisanog prvog i drugog ciklusa studija, u akademskoj 2025/2026. godini

Kao student _____ godine studija na _____
(naziv fakulteta/akademije)

Univerziteta u Tuzli, prijavljujem se na Konkurs za dodjelu stipendija nadarenim redovnim studentima javne visokoškolske ustanove koja djelatnost visokog obrazovanja obavlja na području Tuzlanskog kantona, prvog i integrisanog prvog i drugog ciklusa studija, u akademskoj 2025/2026. godini, koji je objavljen na internet stranici Ministarstva obrazovanja i nauke Tuzlanskog kantona dana _____.10.2024. godine.

Pažljivo pročitati obrazac u daljem dijelu teksta i čitko popuniti velikim slovima!

Lični podaci:																	
Ime (ime jednog roditelja) prezime																	
Mjesto i datum rođenja																	
Državljanstvo																	
Adresa stanovanja (mjesto, broj, općina/grad)																	
Kontakt: telefon, e-mail																	
Broj transakcijskog računa kandidata																	
Broj partije-transakcijskog računa																	
Naziv banke-filijale u kojoj je otvoren transakcijski račun i adresa																	

Uz prijavni obrazac dostavljam sljedeću dokumentaciju:

- _____

○ _____

○ _____

○ _____

○ _____

Napomena:

1. Podnosilac prijave odgovara za vjerodostojnost svih unesenih podataka.
2. Uvid u Vaše lične podatke mogu imati samo osobe koje su uključene u proces provođenja konkursne procedure.

(potpis podnosioca prijave)

1. Svojeručnim potpisom i ovom izjavom potvrđujem pod materijalnom i krivičnom odgovornošću da su gore navedeni podaci istiniti.

2. Svojeručnim potpisom potvrđujem i dajem pisanu saglasnost za korištenje mojih ličnih podataka kroz cjelokupan postupak po Konkursu za dodjelu stipendija nadarenim redovnim studentima javne visokoškolske ustanove koja djelatnost visokog obrazovanja obavlja na području Tuzlanskog kantona, prvog i integrisanog prvog i drugog ciklusa studija, u akademskoj 2025/2026. godini, u skladu sa Zakonom o zaštiti ličnih podataka BiH.

Mjesto: _____

Datum: _____

(potpis podnosioca prijave)

(naziv visokoškolske ustanove)

(adresa i sjedište visokoškolske ustanove)

Broj:

Datum:

Na osnovu _____ izdaje se sljedeće:

UVJERENJE

_____ upisan je u akademskoj 2025/2026. godini _____ put
(ime, ime jednog roditelja i prezime studenta)

u _____ godinu studija na _____ u statusu _____
(naziv fakulteta)

studenta, i do upisa navedene godine studija položio je sve ispite iz prethodnih godina studija.

Imenovani student je u toku redovnog studija ostvario sljedeći prosjek ocjena:

- prosjek ocjena u prethodnoj godini studija: _____
(sveden na dvije decimale)
- ukupan prosjek ocjena u svim prethodnim godinama studija: _____
(sveden na dvije decimale)

Potpis izdavaoca uvjerenja: